

11 NOV 1998

Mahkamah-Anwar (Petang)

KPN DIMAKLUM MENGENAI SURAT ANWAR OGOS TAHUN LEPAS

KUALA LUMPUR, 11 Nov (Bernama) -- Perbicaraan kes rasuah Datuk Seri Anwar Ibrahim hari ini diberitahu bahawa Ketua Polis Negara (KPN) dimaklumkan mengenai surat perihal salah laku Timbalan Perdana Menteri dan operasi "Solid Grip" pada Ogos 1997.

ACP Mazlan Mohd Din, dari Cawangan Khas, Bukit Aman berkata beliau memberi taklimat kepada KPN mengenai surat dan operasi berkenaan yang berkaitan pada pertemuan di pejabat ketuanya itu pada pukul 9 pagi, 11 Ogos 1997.

Beliau berbuat demikian setelah diminta oleh Pengarah Cawangan Khas Datuk Mohd Said Awang, katanya.

Mazlan, saksi pendakwaan ketujuh memberi keterangan demikian pada perbicaraan Anwar, 51, yang menghadapi empat tuduhan mengikut Ordinan 22 (Kuasa-kuasa Perlu) Darurat 1970.

Anwar dituduh menggunakan kedudukannya untuk mendesak polis mendapatkan dua orang untuk menarik balik dakwaan mereka berhubung salah laku seks terhadapnya.

Mazlan yang disoal oleh Timbalan Kanan Pendakwa Raya Azahar Mohamed mula memberi keterangan pada pukul 3.15 petang sebelum mahkamah menangguhkan prosiding 35 minit kemudian. Mahkamah bersidang semula 9.15 pagi esok.

Sebelum ini, mahkamah diberitahu bahawa polis menjalankan operasi yang dinamakan "Solid Grip" berkaitan dakwaan salah laku seks Anwar pada 1992.

Mazlan dalam keterangannya berkata pada 9 Ogos 1997 semasa tugas utamanya sebagai Asisten Komisioner operasi bahagian cawangan khas, beliau menerima panggilan telefon daripada Timbalan Pengarah Cawangan Khas II Datuk Amir Junus yang ingin tahu sama ada beliau mempunyai maklumat mengenai surat berkenaan dan skandal seks Anwar.

Pada perbicaraan yang lepas mahkamah diberitahu bahawa surat bertarikh 5 Ogos 1997 yang ditulis oleh Ummi Hafilda Ali itu dialamatkan kepada Perdana Menteri Datuk Seri Dr Mahathir Mohamad.

Kandungannya antara lain menyebut perbuatan homoseksual Anwar dengan bekas pemandunya, Azizan Abu Bakar dan hubungan seks bekas Timbalan Perdana Menteri dan Menteri Kewangan itu dengan isteri bekas setiausaha peribadinya.

Mazlan berkata setelah memaklumkan bahawa beliau tidak mempunyai maklumat ketika itu, beliau memberitahu Amir bahawa beliau akan berusaha mendapatkannya melalui sumber-sumbernya.

"Setelah menyemak, pada sebelah petang, lebih kurang pukul 2, saya memaklumkan kembali kepada beliau (Amir) bahawa saya mempunyai maklumat berkenaan," katanya.

Semasa Azahar bertanya dari mana beliau mendapat maklumat itu, Hakim Datuk S. Augustine Paul mencelah dan pada masa yang sama salah seorang daripada sembilan peguam Anwar, Gurbachan Singh bangun dan membantah soalan berkenaan.

Paul: Saya membantah sebelum anda.

Kata-katanya disambut dengan ketawa mereka yang berada dalam mahkamah.

Ketika Mazlan menjawab pertanyaan Azahar bahawa beliau mempunyai maklumat mengenai operasi khas "Solid Grip" itu, Hakim Paul berkata ia tidak perlu diteruskan kerana ia tiada kaitan dengan kes itu dan Azahar menjelaskan bahawa pendakwaan tidak akan meneruskan secara terperinci mengenainya.

Menyambung keterangannya, Mazlan berkata Amir mengarahkannya supaya ke Lapangan Terbang Sultan Abdul Aziz Shah, Subang, pada keesokan harinya untuk memberi taklimat kepada Mohd Said yang kembali dari luar negara.

Katanya semasa di sana bersama Amir, beliau memberi taklimat kepada Mohd Said mengenai surat itu dan operasi berkenaan secara ringkas pada pukul 10 malam, tetapi diminta untuk memberi taklimat terperinci pada keesokan harinya.

Mazlan berkata pada keesokan harinya beliau memberi taklimat semula kepada Mohd Said.

Azahar kemudian bertanya mengenai sebab taklimat operasi Solid Grip itu diberikan secara mendalam dan soalan itu dibantah oleh peguam Christopher Fernando yang turut dipersetujui oleh hakim.

Mazlan berkata selepas taklimat itu beliau diarahkan oleh Mohd Said supaya memberi taklimat kepada KPN dan beliau ke sana pada pukul 9 pagi bersama Amir. Beliau memberi taklimat kepada KPN mengenai surat perihal salah laku TPM dan operasi Solid Grip yang ada kaitan.

Fernando sekali lagi membantah soalan itu dan Hakim membenarkannya.

Mazlan berkata setelah taklimat itu KPN telah memintanya meneruskan siasatan terhadap surat itu dan ingin tahu mengenai keluasan penyebaran surat itu.

"Di samping itu KPN telah menyerahkan surat perihal salah laku TPM kepada Amir untuk tindakan kami selanjutnya," katanya.

Beliau berkata pada 12 Ogos 1997, pukul 3 petang, semasa ditemani Amir dan Mohd Said, beliau sekali lagi berjumpa KPN yang meminta laporan penyebaran surat itu.

"Saya melaporkan kepada KPN bahawa ID14 (surat itu) tidak begitu luas pengedarannya dan memaklumkan bahawa penulis surat itu dalam proses memajukannya kepada Perdana Menteri," katanya.

Setelah selesai taklimat itu, KPN telah mengarahkannya supaya terus memantau situasi dan melaporkan kembali kepadanya, katanya.

-- BERNAMA
NHD AHH NMO